

Opitz, Martin: Vff Herrn Ludwig Hebers Hochzeit (1624)

1 Triumph/ du keusche Lieb/ triumph du nun solst singen/
2 Die gegenwertig Zeit mit Ehr vnd Frewd vollbringen.
3 In beider Ehleuth Hertz rüst deinen Wagen auß/
4 Fahr als ein Siegerin in das bekante Hauß.
5 Dann du das schöne Joch/ darnach vor kurtzen Zeiten/
6 Der Bott deß Todts getracht/ dasselbig außzureutten/
7 Auffß new erobert hast: da doch fast gantz vnd gar
8 Hinweg deß lebens trost/ hinweg die hoffnung war.
9 Du hast die tödlich hitz/ als sie so kranck da lagen/
10 Daß auch in sie der Todt sein letztes recht wolt wagen/
11 Verendert in ein hitz/ davon die Lieb sich nehr/
12 Gleich wie vom fetten Oel ein glut vnd flamm sich mehrt.
13 So hurtig kan die Lieb ein schönen wechsel finden/
14 Vnd von deß Fiebers hitz jhr Fackel selbst anzünden/
15 Davon krafft/ kühlung/ trost/ ein Hertz im ander/ hat/
16 Vnd wird von steter Lieb doch nimmer müth noch matt.
17 Die kousche Lieb ist selbst jhr Seugam vnd ernehmer/
18 Vnd findetnimmer mehr kein Rauber noch Zerstörer/
19 Wo fern sie beide nur in gleicher wage stehn/
20 Wo fern sie beide nur in einem gleisse gehn.
21 Kraut/ Wurtzel/ Safft vnd Tranck/ hab ich gar oft gehöret/
22 Zu brauchen ist vmbsonst/ damit Lieb werd gemehret.
23 Dann eins dem andern oft/ so brauchen will die kunst/
24 Den Todt zu trincken gibt/ an statt der Lieb vnd gunst.
25 Lieb selbst der Liebtranck ist/ lieb selbst die Lieb gebietet/
26 Wie in eim Thal vom schall ein widerschall herrüeret/
27 Die Lieb durch Tranck gemacht/ mit haß doch endlich lohnt.
28 Die Lieb durch Lieb gemacht/ bey zweyen ewig wohnt.
29 Von diesem Liebtranck nun beid Ehleuth sollen trincken/
30 Wann in dem haußstand will das Glück bißweilen hincken:
31 Wans/ nach deß Ehestands brauch/ nit/ wie jhr wollet/ geht/
32 Wann nicht der Windt allzeit/ wie jhr begehret/ weht.
33 Ein solchen Liebtranck wolt einander fleissig bringen/

- 34 Biß jrgend in eim Jahr wir also weiden singen:
35 Secht was der Liebtranck hat gewirckt in dieser Zeit.
36 Diß wird alsdann euch sein die höchste lust vnd frewd.

(Textopus: Vff Herrn Ludwig Hebers Hochzeit. Abgerufen am 23.01.2026 von <https://www.textopus.de/poems/10771>)